



DISPOSICIÓN ADICIONAIS

VI. DISPOSICIÓN ADICIONAIS

Primeira.- *Instrumentos para a coordinación de servizos da Xunta de Galicia*

No marco do que establece a sección III do capítulo I do Título I da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o Consello da Xunta de Galicia poderá crear comisións ou órganos colexiados de coordinación en materia de transporte público e integración de servizos de transporte, ditando para tal fin as oportunas disposicións de carácter organizativo.

Segunda.- *Vehículos autorizados para a prestación de servizos de transporte*

Como complemento das formas de prestación de servizos de transporte público en vehículos de turismo, reguladas pola Lei 4/2013, do 30 de maio, de transporte público de persoas en vehículos de turismo, os contratos de xestión de servizos públicos de transporte poderán prever a súa prestación parcial mediante outros vehículos turismo de nove prazas que o contratista destes servizos adscriba exclusivamente á súa prestación.

Para tal fin, a consellería competente en materia de transportes deberá acordar a creación dunha categoría de autorización administrativa que habilite para a realización de transporte público regular de uso xeral ou mixto en vehículos de turismo. Nesta normativa de desenvolvemento fixaranse os requisitos de acceso á dita autorización, que se condicionará á posesión polo contratista do servizo público de transporte regular de habilitación para a realización da actividade de transporte público en vehículos de dez ou máis prazas, e se fixarán as condicións que deban cumprir tanto o persoal de conducción como os correspondentes vehículos, que en todo caso serán equivalentes ás esixidas na referida habilitación.

O outorgamento destas autorizacións condicionarase á verificación da ausencia na zona onde se preste o servizo público de transporte regular de titulares de autorizacións de transporte en taxi dispostos á subcontratación das prestacións parciais do servizo con esta clase de vehículos, que adscriban para tal fin á súa autorización vehículos de oito ou nove prazas.

Terceira.- *Ampliación do prazo para a posta en marcha das emisións e pago da taxa do servizo de comunicación audiovisual de televisión correspondentes ás adxudicacións transformadas en licenzas*

O prazo para responder das obrigas e para materializar os compromisos asumidos nas ofertas presentadas e para acreditar o cumprimento das obrigacións contidas no pre-

go de bases e na normativa reguladora para a posta en marcha das emisións e pago da taxa, indicado nos artigos 38 e 40 da lei 12/2014, do 22 de decembro, de medidas fiscais e administrativas, queda ampliado en catro anos, que se contarán a partir da finalización do prazo anterior.

Cuarta.- *Integración do corpo de letrados do Consello Consultivo na escala de letrados da Xunta de Galicia.*

Un.- Suprímese o corpo de Letrados do Consello Consultivo de Galicia, regulado no artigo 30 da Lei 3/2014, de 24 de abril, do Consello Consultivo de Galicia.

Dous.- O persoal funcionario de carreira pertencente ao indicado corpo de letrados intégrase na escala de letrados da Xunta de Galicia, do corpo superior da Administración Xeral da Comunidade Autónoma, subgrupo A1, prevista no número 1 da disposición adicional oitava da Lei 2/2015, do 29 de abril, do emprego público de Galicia, con garantía do seu grao persoal consolidado e antigüidade."

Quinta.- *Supresión do ente Centro Informático para a Xestión Tributaria Económico-Financeira e Contable (CIXTEC)*

Un.- Autorízase a supresión do Centro Informático para a Xestión Tributaria Económico-Financeira e Contable (CIXTEC) cujas funcións asumiranse pola Axencia para a Modernización Tecnolóxica de Galicia (Amtega), de conformidade co que se estableza nos estatutos da dita axencia.

Dous.- A supresión do Centro Informático para a Xestión Tributaria Económico-Financeira e Contable (CIXTEC) levarase a cabo por Decreto do Consello da Xunta no que se determinará o destino dos seus bens, dereitos e obrigas, así como as medidas aplicables ao persoal funcionario e laboral que estivese prestando servizos no Centro Informático para a Xestión Tributaria Económico-Financeira e Contable (CIXTEC) no momento da supresión. A efectos orzamentarios, esta supresión implicará a integración das partidas económicas e funcionais de gasto dos orzamentos do CIXTEC nos orzamentos de Amtega.

Sexta.- *Axencia Galega da Industria Forestal*

Un.- Mediante a presente lei autorízase a creación da Axencia Galega da Industria Forestal como axencia pública autonómica adscrita á consellaría competente en materia de economía, que ten como fins xerais e obxectivos básicos actuar como un instrumento de xestión eficiente no exercicio de funcións relacionadas co impulso da actividade económica asociada ao sector forestal, coa mellora da competitividade e da innovación das empresas do sector e coa coordinación dos centros de investigación en materia forestal.

Dous.- No desenvolvemento dos seus fins, a Axencia Galega da Industria Forestal procurará os seguintes obxectivos:

- Identificar os diversos sectores económicos e productivos asociados ao recurso forestal, definir os sectores estratéxicos, e procurar en todo caso a compatibilidade e sostibilidade dos diversos usos produtivos do monte.
- Participar na planificación e na ordenación dos aproveitamentos forestais dirixida á mellora e sostibilidade da produción forestal; así como na mellora da xestión e aproveitamento dos recursos forestais.
- Mellorar a competitividade e innovación das empresas do sector forestal, con especial incidencia na segunda e seguintes fases de transformación do recurso.
- Coordinar os centros de investigación e tecnolóxicos vinculados á industria forestal.

Tres.- Esta axencia asumirá os medios persoais e materiais que respecto dos seus fins e obxectivos corresponden na actualidade a calesquera outros departamentos, nomeadamente os correspondentes ás unidades afectadas da Consellería de Medio Rural, os cales se suprimirán nas súas estruturas no momento de creación da axencia e quedarán integrados nela.

Catro.- Mediante decreto do Consello da Xunta de Galicia procederase á súa creación, así como á aprobación dos estatutos que detallen as funcións específicas que desenvolverá.

Cinco.- O seu réxime xurídico será o establecido na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

